

V. LITTERAE UNIVERSALES REGIAE SUPER EXACTIONE DUCILLORUM IN CONVENTU REGNI GENERALI LAUDATA

Sigismundus etc. Universis et singulis ecclesiasticis et saecularibus consiliariis regni nostri ceterisque subditis nostris quibuscunque tam terrestribus quam civitatum et oppidorum honoribus et officiis insignitis ad quorum notitiam hae nostrae pervenerint litterae et praesertim in^a et districtu eius^b consistentes sincere nobis et fidelibus dilectis gratiam nostram regiam. Reverendissimi ac reverendi in Christo patres, magnifici, generosi, nobiles, famati et providi, sincere nobis dilecti et fideles. Noveritis communi omnium tam spiritualium quam saecularium consiliariorum nostrorum et nuntiorum terrestrium in conventu generali Piotrkouiensi congregatorum voto et concordii voluntate exactionem ducillorum quae *czopowe* dicitur multis et arduis necessitatibus reipublicae ita exigentibus decretam esse, quae inchoari debet a festo Pentecostes proximo [9 VI 1538] et continuari per integrum annum ad aliud festum Pentecostes anni millesimi quingentesimi trigesimi noni [25 V 1539]. Exigetur autem et solvi ac exigi debebit eadem ipsa contributio ducillorum secundum antiquam consuetudinem modo videlicet infrascripto. Ut quilibet cerevisiam coquens venalem ex quibuscunque braseis fuerit, eadem ipsa cerevisia cocta, hoc est sive ipsa brasea sint, civium et dominorum sive ex molendinis provenientia et emensurata sive domi facta a quolibet vase singillatim vel coctura ipsius cerevisiae iuxta locorum consuetudinem ante hac observatam exactionem ipsam ducillorum in manus infrascripti exactoris fideliter solvat. Ita, ut a maiori coctura alias *warv* plures grossi solvantur et a minori pauciores iuxta vasorum numerum et quantitatem. Ex exactores constitutionem quam ubi opus et quotiens expediens erit nostra auctoritate faciet et constituet notariosque et custodes, tam in civitatibus et oppidis, quam etiam in villis iuxta arbitrium suum, exactor etiam ipse deputabit et iuramento corporali ad fidelitatem illos astringet. Ternarii vero more vetusto circa quemlibet grossum solvendum pro civitatum et oppidorum reparatione conserventur. Tabernatores vero singuli, cerevisiam coquentes a quolibet vase mensurae civilis per unum grossum alias secundum antiquam consuetudinem, coctam vero a dominis tam spiritualibus quam saecularibus ad propinandum recipientes non secus quam si adventitiam propinarent ratione ipsius contributionis per sex grossos solvent. Item a medio vase vini alias *polkuffek* florenus unus cum triginta quadrantibus solvendus. Item a drelink sive Seremisii vase vini et similiter ab iis vasis quae *fydri* vocantur duo floreni cum sexaginta quadrantibus solvendi. Item a quolibet barili malmatici vel vini Italici unus *orth* cum septem ternariis solvantur. A barili vero simplicis vini duo grossi solvantur et duo ternarii. A medonis vase communi duo grossi cum duobus ternariis. A cerevisia adventitia sive externa ut Swidnyczensi, Glogouiensi, Thessinensi, Bernouiensi et alia quacunque, a quolibet eius vase duo grossi solvantur. Et quicumque non soluta prius exactione praefata cerevisiam, vinum, medonem, malmaticum et alium quemcunque potum ex praedictis vendere et propinare in fraudem reipublicae praesumpserit, totum illud, in quo fraudem commisit seu committere voluit, irremissibiliter amittet et ad poenam regalem solvendum quoties id fecerit obligabitur. Capitaneusque loci in tales omnes et singulos fraudem huiusmodi committentes animadversionem debitam veritate rei cognita, non habendo respectum ad quempiam, irremissibiliter exequatur. Ad quamquidem exactionem colligendam diligenterque et fideliter exigendam in ipsa terra^c et districtibus eius^d constituimus vobis omnibus et singulis quorum interest, mandantes quatenus praefato exactori sive ab eo substituto de ipsa exactione ducillorum respondeatis et responderi faciatis. Vos vero locorum capitanei eos qui rebelles vel negligentes erunt et quos ipse exactor deferet, per pignorationes solitas ad solutionem huiusmodi exactionis compellatis sub poenis nostris contra negligentes capitaneos in novis et antiquis statutis descriptis et pro gratia nostra aliter non facturi. Datum Piotrcouie in conventionem generali feria quinta ante dominicam Invocavit proxima, anno Domini millesimo quingentesimo trigesimo octavo [7 III 1538], regni vero nostri anno trigesimo secundo. Ad mandatum Sacrae Maiestatis Regiae proprium.

^a W MK₂pozostawiono okienko. ^b W MK₂pozostawiono okienko. ^c W MK₂pozostawiono okienko. ^d W MK₂pozostawiono okienko.